

**Siunissami piginnaaneqarnerulernissaq linjefaginilu minnerunngitsumik matematikimi, tuluttoornermi, fysik/kemimi naturfagimilu atuartitsisalernissamut periarfissat annertusarniarlugit Meeqqat atuarfianni ilinniartitsisut ilinniaqqinnissaminnut piginnaangorsaqqinnissaminnullu atatillugu pitsaanerusunik periarfissaqarnissaat pillugu nalunaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarusiaq inatsisartut 2013-mi upernaakkut ataatsimiinneranni saqqummiunneqassaaq.**

(Inatsisartunut ilaasortaq Andreas Uldum)

### **Akissuteqaat**

(Ilinniartitaanermut, Ilisimatusarnermut Nunanilu Avannarlerni Suleqatigiinnermut Naalakkersuisoq)

### **Aappassaaneerinnineq**

Naalakkersuisut aallaqqaasiullugu Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaat qujassuteqarfigissavaat siunnersuutip peqqissaartumik suliarineqarnera pillugu, siunnersuutillu aappassaaneernejarnissaanut atatillugu isumaliutissiissutaasoq pillugu.

Ataatsimiititaliaq suliap aappassaaneernejarnissaanut atatillugu imaattunik allannguutissatut siunnersuuteqarpoq:

Inatsisartut aalajangiiffigisassaattut siunnersuut, Naalakkersuisut Ilinniartitaanermut pilersaarummut II-mut ilaliullugu ilinniartitsisut linjefagini ilinniaqqinnissamut piginnaangorsaqqinnissamullu periarfissaat nalilersussagaat, pisariaqartitsinerlu meeqqat atuarfiannut inuiaqatigiinni ingerlaavartumik allanngoriartortuni pissutsinut naleqqussarlugu. Ataatsimiititaliap Naalakkersuisut kaammattussavai suliamut tunngatillugu soqutigisaqartut Ilinniartitaanermut pilersaarut II-p suliarineqarnerani suleqatigissagaat.

Naalakkersuisut maluginiarsimavaat ataatsimiititaliap pissusissamisoortutut isigigaa siunnersuummi anguniagaasut Ilinniartitaanermut pilersaarummut II-mut ilaatinnejarnissaat. Ilutigisaanillu ataatsimiititaliap nalilersuinermi fagit tamarnik ilaatinnejarnissaat pisariaqartippaa, fagit ilaasa allanit pingaarnerusutut isigineqarneranniit.

Naalakkersuisut ataatsimiititaliap oqaaseqaatai allannguutissatullu siunnersuutai tusaatissatut tiguaat, tamannalu tunngavigalugu siunnersuut akuersissutigineqartussatut inassutigalugu.